

[Augsburg], 6. Dezember 1555

An Johannes Oporinus

UB Basel, Fr. Gr. I 11, fol. 192r.
Steinmann Nr. 684.

S. P. D. Quid tu mihi Horres morres, homo omnium hominum qui viuunt, vixerunt, victurique sunt, superbissime? qui, propterea quod literae meae neque prolixae, neque elegantes neque honorificae sunt, sed breues, hirtae, strigosae ac planè lupi similes, eas te accepisse dissimulas, cum mihi constet, te, si non omnes (scripsi enim amplius quaternas) saltem binas accepisse. Quod si ista ratio valebit, vt literae cuiusmodi a a me scribi solent (neque enim possunt aliae) literarum nomine indignae sint, ac prorsus nullae: fatebor equidem me superbū esse ac negligentem. Sin imbecillitas et tenuitas ingenij iustum habet excusationem: haec tu non modò superbissimus, sed iniquiss[imus] etiam es in me iudex. Monitum autem te velim, ne lacessas lupum, quem dentibus et faucibus plus valere nosti quam lingua et manibus. καὶ τοῦτ' ἀντιπεπαίχθω σοὶ. Quod ad nepotem tuum attinet, illa de qua tecum locutus fui, neglecta fuit iampridem occasio, ac nescio quis casus quaeūe superbia me et Micylli et Hartungi responsis priuaurit, quibus ego gratum facere studueram, et literas meas esse redditas, singulas saltem, non dubito. Nunc autem vtrō sese obtulit huiusmodi opportunitas. Est hic princeps medicorum D. Gereo Seiler, qui habet filiolum 10 annos natum, primis vtriusque linguae elementis bene institutum, ingenioqüe valentem. Cuius praceptor propediem ecclesiasticum munus subiturus est. Pater successorem idoneum quaerit, cum de Theodoro nostro narrarem, ad te scribere iussit, eumqüe vel tua causa, vel ob commendationem meam, alijs libenter praepositurum dixit. Conditones hae sunt, vt astringat ei fidem suam ad biennium, quò puerum in priuatis aedibus doceat. eo elapso, vtrique liberum sit, si displicuerit ea functio, aliter suis rationib[us] consulere.

Victus cum domino communis.

Vestis honesta.

25 f. pro annuo salario.

Quae nepotis tui commoditas sit, ignoro. Si nihil habet melius, hoc non videtur aspernandum, et fortassis hac occasione ad altiora promouebitur. Sed certi nihil habeo de rebus incertis polliceri, praeter benevolentiam et studium ei omni tempore paratum. Haec ei significare velim, et vt quamprimum eius responsum habeamus, cures, vt sciam, an, et quando huc sit venturus. Libelli abs te missi domino grati sunt. Vale. Postridie nonas Decembr[is] 1555.

Hiero[nymus] Wolfius
Tuus.